



FAFANA

Volana Martsa 2023 - Laharana 233 - Vidiny 1 000 Ariary

“...Soraty ny fahitana, ka ataovy velona tsara ny soratra eo amin’ny Fàfana, ...” Habakoka 2²

GAZETY AVOAKAN'NY FJKM ANKADIFOTSY ISAM-BOLANA

Herinandron'ny Fianakaviana ➤5 Miverena amin'Andriamanitra mba hananana fiainam- pianakaviana mirindra



FINARITRA !



Ry havana malala
Ry Kristiana hayana

Ho aminao anie ny Fiadanana.
Hibanjina lohahevitra vaovao
indray isika, amin'ity volana
martsa ity dia ny hoe "**Mamerina**
ho amin'ny fahamarinana ny
Tompo"

Hatrany amin'ny testamenta taloha, dia mifamatotra amin'ny fanekena nifanaovana na eo anatrehan'ny fanekena nifanarahana Jesoa Kristy no lalatitra holo ny otantsika. Izy no nanamarinan'Andriamanitra antsika araka ny Teniny "Izaho no Lalana sy Fahamarinana ary Fainaina". Jao 14:6.

“Mamerina ho amin’ny fahamarinana ny Tompo”

no mahamarina na tsia antsika. Samy manana ny andraikitra tan-drify azy ny tsirairay eo anatre-han'ny fanekena. Andriamanitra dia marina sy mahatoky, mihazona ny fanekeny hatramin'ny farany ary tsy mivadika amin'ny fanekeny, fa isika olombelona dia tsy nahatana ny fanekena. Andriamanitra ihany no marina

Tsy maintsy namerina antsika ho amin'ny fahamarinana ny Tompo tamin'ny alalan'ny fanateram-pisonronana, nefa tsy nahafapo an'Andriamanitra izay rehetra nataontsika. Hany ka ny zanany lahitokiana, i Jesoa Kristy mihitsy no nafoiny ho sorona ho antsika. I Jesoa Kristy no fanatitra noho ny

Ny olona tafaverina ao amin'i Jesoa Kristy no marina ary voamaina maimaimpoana. Ny voambolan'i Paoly Apostoly dia hoe "*Ao amin'ny Tompo*" ary ny voambolan'i Jaona dia hoe "*Ireo nateraka indray*". Rehefa tafaverina ao amin'ny Tompo isika, dia tafaverina ho amin'ny fahamarinan' Andriamanitra ka tsy mahazo manota intsony satria taruhan'ny Fanahin' Andriamanitra.

Ny fiverenana amin'ny fahamarinana dia endrika famonjena.

Koa ny lohahevitra iarahantsika mibanjina mandritra ity volana ity dia hitaomana sy hitarihana antsika fiangonana hiverina amin'Andriamanitra, fa Izy no ilay Lalana sy Fahamarinana ary Fiainana ho antsika.

Nympitandring Ravaloson

FIAINAM-PIANGONANA > 2

TAOM-BAOVAON'NY Fiangonana TENY AMIN'NY CCI IVATO

Nanamafisana ny fifankatiavana teo amin'ny mpianakavin'ny finoana



FIANAM-PIANGONANA ➤ 8

MTA

Fanokafana ny fankalazana an'Andriamanitra noho ny faha-35 taona



FIAINAM-PIANGONANA ➤ 2

Foibe FJKM

Tsingerin-taona voalohan'ny fanompoam-pivavahana teny Anglisy



Taom-baovaon'ny fiangonana teny amin'ny CCI Ivato Nanamafisana ny fifankatiavana teo amin'ny mpianakavin'ny finoana

Notanterahina tao amin'ny CCI Ivato (Centre de Conférence Internationale Ivato) ny sabotsy 25 Febrero 2023 tontolo andro ny fankalazana ny taom-baovao 2023. Natomboka tamin'ny 9 ora sy sasany ny fotoana, tamin'ny alalan'ny fanompoam-pivavahana izay notarihin'Andriamatoa Ravaloson Mpitandrina Ankadifotsy.

Tsara marihina fa hatrakin'izay dia alahady aorian'ny fanompoam-pivavahana tokana no nanaovana izany fankalazana ny taom-baovao. Araka ny fanazavana nomen'ny Andriamatoa Randrianarimanana Ny Andry, filohan'ny Vaomieran'ny Fiombonam-piaianana sy Andriamatoa Razanamamandry Tafika, tompon'andraikitra tamin'ny fikarakarana dia noho ny diniky nifanaovan'ny biraо, ny mpitandrina nifampiresaka tamin'ny vaomieran'ny fiombonam-piaianana dia hanatanteraka ny fankalazana ny taom-baovao ny fiangonana.

Ka rehetra nitady toerana maro dia nisafidy ny CCI Ivato satria mahazaka olona maro ary mendrika ny omena ny soa, sy ny tsara ary afaka hifaly sy mahafeno ny mpiangona eto Ankadifotsy ny toerana sady koa ilaina ny mitondra ny mpianakavin'ny finoana



Ny Mpianakavin'ny finoana nifaly teny amin'ny CCI Ivato

misitaka kely mivoaka ny fiangonana hahafahana mifampiaraha ba sy hitsinjovana ny alahady mba tsy ho voaelingelina. Ka ny tanjona amin'izany dia miara-mifaly ny mpianakavin'ny finoana ary tsy ho voatohintohina ny fanompoam-pivavahana alahady. Tsy mora ny fanomana satria raha noerireretina fa ho 1 100 ny olona ho tonga dia nahatrata 2 000 latsaka izany. Nisy ny fitrotroana am-bavaka niarahina tamin'ny SaFif "Miara-miisa hahasoa ny zavatra rehetra". Hita koa ny fiaraha-miasan'ny vaomieran'ny fiombonam-piaianana tamin'ny Diakona sy ny Loholona, Biraon'ny Fiagonana, ny Mpitandrina sy ireo Sampana velona ato amin'ny fiangonana izay tena niara-niasa

tokoa tamin'ny fanatanteraha na izany, tao koa ireo mpikirikira ny fitaovam-piseraserana nahafahana nampita ny vaovao izay tokony ho fantatra ary tsy adino koa ny tolo-tanana izay na-taon'ny vahoaka kristiana izay nentina nanampiana ny hoentimanana tamin'ny fikarakarana. Hita taratra tamin'izany fiombonan'ny vahoaka kristiana izay niray aina, niara-nifaly izay zavadehibe ho an'ny Fiagonana. Marihina moa fa ny Vaomieran'ny fiombonam-piaianana dia mpanatanteraka fa ny biraо no mamolavola ny hevitra. Ny tanjona tamin'izao moa dia ny fifankatiavan'ny vahoaka kristianina satria araka ny fantatsika dia misy fidirana indroa eto amin-tsika ary maro ny tsy mifankaha-

lala akory ka nohezahina mba hisy ny fifampiresahana, sy fifankahalalana bebe kokoa hitsiran'ny fifankatiavana.

Ny momba ny kara-pifandraina dia fomba iray entina hanaovana fandaminana, satria ny zavatra rehetra rehefa tiana handroso dia mila lamina, tsy atao sakana velively anefa izany fa kosa mba hirosoana amin'ny fanatsarana izay nohezahina mba hahafantaranana misimisy koa ny momba ny vahoaka kiristiana, hanaovana ny antontanana, atao ho fifandraisana. Lâlana nitondran'ny Mpitandrina vaovao ho hahafantaranana ireo mpiara-mamoppy sy fandrindrana ny zavatra rehetra satria ny fahaizana mandamina no entina miady.

Nisy koa ny fifampiarahana ireo zokiolona mihoatra ny 65 taona ka nisy teo amin'ny 175 izy ireo no nomena solobodia-koko.

Tao koa ny fampifaliana ireo ankizy tonga tao ary nisy ireo mpanakanto nanafana ny fotoana toy ny Tana groupe, Henri Ratsimbazafy, Mialy Rakotomamonjy, Salomon, Samoela, Johanne, Zoky Andry, SaFif, MTA. Tsy adino koa ny fandravahana nataon'ireo Fikambanana Saha Edena.

**Nanangona Ianja R,
Tojohery, Malala Soa**

FJKM teny Antsonjombe Asa sy fampaherezana nialoha ny fitrotroana am-bavaka

Notontosaina ny alahady 15 Janoary 2023 teny amin'ny Coliseum Antsonjombe ny fanompoam-pivavahana nitondrana am-bavaka ny filohan'ny FJKM mianakavy sy ny taom-piasana 2023.

Nizara roa ny fotoana, tam'in'io andro io ka ny tapany voalohany nanomboka tamin'ny 7 ora hatramin'ny 9 ora sy sasany, dia nisy ny asa sy fampaherezana notarihan'ny Sampana Fifohazana. Ary ny tapany faharoa kosa no nanantontosana ny fotoam-pivavahana lehibe.

Ny nitarika ny fotoana tamin'izany dia Andriamatoa Rakotobe Rajaomanjato Dodaherisoa, Mpitandrina Mpanolotsaina ao amin'ny Biraon'ny Mpiandraikitra Foibe. Ny nitondra ny hafatr'Andriamanitra kosa dia Andriamatoa Andriamampianina Zaka, Mpitandrina, filoha mpanampy Bi-raon'ny Mpiandraikitra Foibe. Ny tao amin'ny Salamo 33: 4 - 11 no nitondrana ny hafatra, ary notsongaina ta-



**Ny Mpitandrina Irako Andriamahazosoa Ammi
notrotroana am-bavaka teny Antsonjombe**

min'izany ny andininy faha-12 : "Sambatra ny firenena izay manana an'i Jehovah Andriamanitra, dia ny olona nosidiny ho lovany". Tamin'izay no nilazany fa ny olona voavela heloka, dia tokony hahay hidera an'Andriamanitra. Teto dia ny raharaha-pirenena, ny fiaianampirenenana, no nitondrana ny hafatra ka nilazany fa izay manana an'i Jehovah no midera an'Andriamanitra ary mam-

panjaka ny fahamarinana ka manome voninahitran'ny Andriamanitra. Ny tsy fision'izany fahamarinana sy tsy rariny izany, dia mitarika ny tsy fahamarinatoerana, tsy misy fandrosoana azo tsapain-tanana, tsy mandeha ny fiaianampirenenana, tsy misy fampivoarana eo amin'ny tokantreno sy ny olona tsirairay. Andriamanitra dia manome programan'asa, izay loharano tsy mety ritra. Koa mila mieritreritra

Taorian'izany dia nisy ny asa vavolombelona. Tamin'izany no nanomezana fankasitrahaha ireo mpandray anjara tamin'ny fisani-nana «Sary famantarana», sy «ny Hira fanentanana hazakazaka masina».

Ary mazava ho azy fa nisy ny fitondrana am-bavaka ny filohan'ny FJKM Dr Irako Andriamahazosoa Ammi, Mpitandrina mianakavy, sy ny taom-piasana 2023.

Nanangona Malala Soa

Sampana Fifohazana Foibe Zanakazo 3 000 no nambolena

Nizara telo ny fotoana :

- Fanomanam-panahy sy fijo-roana vavolombelona
- Fanompoam-pivavahana
- Fambolen-kazo

Ny Tonian'ny SAfif no nitarika ny fotoana. Ny filoha mpanampy FJKM kosa no nitondra ny hafatra avy amin'ny Tenin'Andriamanitra izay nalaina tao amin'ny bokin'ny Salamo 1:1-6. Nohamafisiny ny hambolena ny Tenin'Andriamanitra ao am-po. Andriamanitra mitady izay hahasmatra antsika ka mitaona antisika tsy handeha amin'ny lalan'ny mpanota. Hanongotra izay ratsy ary hamboly izay

tsara. Mangataka amin'ny Tompo mba hiala ny hamafisan-katoka sy ny fo vato satria misfamatotra ny saina sy ny fo ary ny asa atao'ny tanana.

Ary farany, tsy maintsy hot-sarana isika, ka miala nenina amintsika ny Tompo mba hibebaka isika, ny ankohonantsika, ny mpiray tanindrazana amintsika.

Ny Tompo tsy ho avy hiantso ny marina, fa ny mpanota mba hibebaka.

Antsam-piderana

Ny alahady 26 Febrero 2023 no fanateram-bokatry ny

Sampana Fifohazana eto amin'ny Fitandremana. Nisy ny asa sy fampaherezana taorian'ny fanompoam-pivavahana fidirana faharoa. Ny tolakandro kosa dia nisy ny Antsam-piderana niarahana tamin'ireo fiagonana FJKM hafa.

Ny filoha, ny biraо, ny komity, ny mpiandry, ny zanaky ny Fifohazana, ny Sampana Fifohazana, dia misaotra ny Mpitandrina, ny biraon'ny fiagonana, ny mpihevridrahara, ny fiagonana manontolo tamin'ny fahafahana nanatanteraka ny fambolen-kazo sy ny Antsam-piderana.

Harilalaina A.

Foibe FJKM Tsingerin-taona voalohan'ny fanompoam-pivavahana teny Anglisy

13 Febrero 2022 - 12 Febrero 2023, herintaona izao ny nambohan'ny fanompoam-pivavahana amin'ny teny Anglisy tarihin'ny foibe FJKM. Ho fisaorana an'Andriamanitra dia notontosaina tetsy amin'ny FJKM Katedraly Analakely ny alahady 12 Febrero 2023 teo izany fanompoam-pivavahana izany. Hira fiderana toy ny mahazatra no eny am-panombohana, izay niarahana tamin'ny Antoko mphira avy ao amin'ny Katedraly Analakely sy ny Blue Cross Gospel FJKM Ambatomena.

Ny filohan'ny FJKM Dr Irako Andriamahazosoa Ammi, Mpitandrina kosa no nitondra ny hafatr'Andriamanitra tamin'ny nanasongadinany hoe : "mihetseha araka ny Tenin'Andriamanitra, mitenena araka ny Tenin'Andriamanitra ary aza manohitra ny Tenin'Andriamanitra."

Nofaranana tamin'ny fiarahana nandray ny fanasan'ny Tompo sy fampazarana ny mamy ny fotoana. Ny fanompoam-pivavahana manaraka indray dia hotanterahina etsy amin'ny FJKM Ambatonakanga ny alahady faharoa amin'ity volana Martsa ity.

SPIA-19 : Tafatsangana ny fanompoam-pivavahana amin'ny teny Anglisy

Fa nifandinran-dalana tamin'io andro io koa ny fanokafan'ny Synodamparitany Iarivo Avaradrano SP 19 ny fanompoam-pivavahana amin'ny teny Anglisy eo amin'ny izay natao tetsy amin'ny FJKM Ambodivoina Filadelfia. Izay nanetanana ny Fitandremana samy efa hevitra ny fandaminana mampety azy avy koa.

Fifi AV

125 taonan'ny STK Hanomboka anio ny fifanitsanana Soratra Masina

Tafiditra ao anatin'ny fankalazana ny faha-125 taonan'ny Sampana Tanora Kristiana eto amin'ny FJKM Ankadifotsy dia misy ny fifaninanana Soratra Masina karakarain'ny komitin'ny fankalazana.

Raha ny nanomboka ny volana Febrero teo ny fisoratana anarana dia nifarana ny 4 Martsa teo izany ka ny mpianakavin'ny finoana rehetra no nahazo nandray anjara.

Ny 5 Martsa 2023 no hanaovana ny fifanitsanana ka amin'ny 2 ora no hatao ao amin'ny IFR. Ny 12 Martsa koa no hatao ny fifanitsanana manaraka ka mbola ao amin'ny IFR ihany no hanaovana izany fa amin'ny 3 ora tolakandro kosa.

Ny famaranana dia hotanterahina ny 19 Martsa 2023 amin'ny 3 ora sasany fa eto am-pianganana kosa no hanaovana azy.

"Izao no natao dia mba ahafantaranana hoe hafraiza ny lentan'ny fahalalan'ny olona ny Soratra Masina. Efa natao tamin'ny faha-100 taona izao fifaninanana izao ary mbola tianay naverina tamin'ity faha-125 taona ity", hoy ny fanazavan-dRandrianalison Herizo, mpikambana ao anatin'ny komitin'ny fankalazzana.

Manentana ny mpianakavin'ny finoana araka izany ny STK hanotrona izany fotoana ho voninahit'Andriamanitra irery ihany.

fifi AV

TSY HARITRA Bobi, ilay alika antitra indrindra maneran-tany

30 taona sy 266 andro ity alika iray mitondra ny anarana Bobi. Any amin'ny tanana kely iray any ambanivohit'ri Portugal no monina ny tompony, Leone Costa, 38 taona. Tamin'ny 1 Febrero 2023 no nankatoavin'ny ekipan'ny Guinness ny fahalavan-taonan'I Bobi, taorian'ny fikarohana, fandalinana sy fizahana isankarazany natao tany amina laboratoara maro, ka nahalalana fa efa mihoatra ny 30 taona tokoa no nahaveloman'i Bobi. Milanja 29 kg izy ankehitriny ary miriaria ao an-tokantranon'ny tompony miaraka amina saka marobe. Nanomboka ny 1 Febrero teo ary, dia lasa toerana nifamezeveny mpitsidika marobe ity tokantreno kely ity, hijery sy haka sary an'i Bobi, satria nanomboka teo, dia izy no alika voahosotry ny Bokin'ny "Guinness des Records" ho antitra indrindra maneran-tany. Nampahatsiahny ny "Guinness" fa ny alika ao amin'ny sokajy (race) "Rafeiro" izay misy an'i Bobi, dia manana halavan-taona fahavelomana 12 ha-tramin'ny 14 taona raha be indrindra.

RH



The oldest dog ever is Goliath (Portugal, b. 11 May 1947 who is 30 years and 212 days old as verified in Coimbra, Portugal on 9 January 2023)

Tontolo andron'ny mpihevidrahara Fifampiarahabana nahatratra ny taona, fampianarana, fandinihana ny asa mandritra ny taona

Notanterahina ny sabotsy 28 Janoary 2023 tontolo andro, teto am- piangonana ny fivo-ran'ny FLD.

Fampianarana momba ny fifadian-kanina nentin'ny Raiana-mandreny Mpitandrina Ravaloson, no nanombohana ny fotoana.

Ny fifadian-kanina :

- Mariky ny fibebahana (II Sam 12: 16)

Foananao ny herinao, ny maha-izy anao, hamelana an'Andriamanitra hanjaka sy hahery eo aminao.

- Mariky ny fisaonana (II Sam 1: 12)

Ao anatin'ny fotoana tsy hahafahanao manoatra no anehoan'Andriamanitra ny voninahiny.

- Hiatrehana raharaha sarotra (Mpi 20: 26, Mat 4: 1- 4: Jesoa tany an'efitra). Jehovah Andriamanitra ihany no iankohofanaao.

Apetraeo eo am-pelata-nan'Andriamanitra ny ady, ianao tsinontsinona

Ifatio ny fiadiana no-men'Andriamanitra :

- Fangatahana fampsitsaharana

sy fisorohana ny loza.

- Fangatahana fanasitrana.

- Fanomanana amin'ny fihao-



Ny mpihevidrahara nandritra ny fihaonana teto am-piangonana

nana amin'Andriamanitra (Eks 34: 28); tsy ny herinao no hi-haonanao amin'Andriamanitra.

- Fahatsiarovana ireo loza miseso eto amin'ny firenena.

Ny hevity ny fifadian-kanina

- Fanoherana, fandresena ny filan'ny nofo, fanetren-tena, fam-pandeferana ny ara-nofo, fanomezan-danja ny ara-pahany.

Ny endriny

- Fifadian-kanina manontolo.

- Fifadian-kanina ampahany.

(Rom 3: 10)

- Fifadian-kanina faobe (vahoaka manontolo)

- Fifadian-kanina manokana (ho an'ny tsirairay avy, araka ny fandaminany)

Inona no tsy mety?

- Fombafomba fotsiny ihany, fi-sehosoana, filan-javatra.

Ny toe-po no zava-dehibe amin'ny Tompo, tandroy ny fahasalamana, ataovy amin'ny nahim-ponao tanteraka, atao amin'ny fandresen-dahatra.

Ny toromarika fotora

- Fivavahana, Tenin'Andriamanitra, fiantrana (mitsinjo ny hafa), tanterhana mangingina, tsy miaraka ny fahafinaretan'ny nofo sy ny fifadian-kanina (fraisana ara-nofo), ataovy

amin'ny finoana sy fahatokiana an'Andriamanitra.

(Dan 10: 2- 4, Dan 10: 12: 12-13, Heb 11: 1, Jos 5: 13- 15)

Fahasahiana (tsy matahota), fanantenana, famaritana (izay ady atrehinao), fahavononan-kery hiatrika ny fahavalo.

Manomeza anjara toerana ho an'ny asan'Andriamanitra amin'ny fiaiananao, Izy no tompon'ny fiantsoana, rehefa ianao, dia ianao, tsy azo soloina. Izy no miara-mandeha aminao. Ny tsy fahavitao ny asan'Andriamanitra dia loza ho anao. Fitahiana mipaka hatrany amin'ny ankohonanao kosa ny fahavitao ny asa niantsoany aminao.

Valim-pitia omen'ny Tompo anao voalohany : "miova ny fiaianao."

Ny valim-pitia faharoa dia ny: "Fanenjehana". 100% ny valim-pitia raisinao amin'Andriamanitra.

Taorian'ny fampianarana, dia niroso tamin'ny fandimihana ny raharaha-piangonana izy ireo, arynofaranana tamin'ny fiafaha-misakafo ny folakandro tamin'ny 3 ora, ho mariky ny fifampiarahabana nahatratra ny taona 2023.

Ho voninahit' Andriamanitra irey ihany.

Malala Andrinaina

Taom-baovaon'ny Sekoly Alahady Notanterahana ny alahady 12 Febroary

Ny alahady 12 Febroary, teo anelanelan'ny fanompoam-pivavahana voalohany sy faharoa, no notanterahina tao am-piangonana ny fifampiarahabana nahatratra ny taona 2023, ho an'ny fianakaviamben' ny Sekoly Alahady: mpandrahara, mpampianatra, mpianatra.

Fiarahana nisakafo no nentina nanamarika izany, arynofaranana tamin'ny fizarana mofomamy ho an'ny tsirairay. Hoy ny filohan'ny Sekoly Alahady, Ranaivoson Rija Nivosoa: "ny sakao" dia anisan'ny fiombonana, fifampizarana, ffanomezana, mifampiry soa, izay anehoana fa iainana ny Tenin'Andriamanitra ianaranana. Fiaraha-mifaly ao amin'i Jesoa.

"Isaorana ny Tompo, misaotra ny rehetra ihany koa nahaton-tosana izany, ary mitaona antsika hatrany ho ao amin'ny sampana Sekoly Alahady", hoy hatrany ny filohan'ny sampana.

Malala Andrinaina



Ampahany amin'ireo mpianatra Sekoly Alahady eto amin'ny Fitandremana Ankadifotsy.

Synodamparitany Iarivo Avaradrano Prezida synodaly mitory Filazantsara amin'ny endriny maro

Handray anjara amin'ny fanantenana amin'ny fanokafana ny Jobily fankalazana an'Andriamanitra noho ny faha-35 taonan'ny Mpamakiteny Ankadifotsy ny GROUPE ACACIA izay tarihan'ny prezida synodaly Iarivo Avaradrano ny alahady 19 Martsa 2023 tolakandro eny Ambohimanga.

Rabetokotany Miarilaza Andriamialy, Mpitandrina, Prezida Synodaly Iarivo Avaradrano. Izany andraikitra izany no hahafataran'ny maro io Mpitandrina io.

Manana zara fanompoana hafa izay entiny mitory Filazantsara ihany koa izy. Tsy inona izany fa ny Hira sy ny Fiderana an'Andriamanitra izay entiny mamelonan sy manentana ny Kristiana hiroso hatrany amin'ny Fiderana sy fanoloran-tena ho an'Andriamanitra.

Efa an-taona maro no nampiasany izany talentany izany, izay tena nomeny toerana lehibe tokoa tamin'ny Fitoriana ny Filazantsaran'i Jesoa Kristy. Manana talenta amin'ireto tontolon'ny hira sy zavamaneno ary fanentana ny Mpitandrina Rabetokotany Miarilaza Andriamialy.

Mpamoron-kira sy mpitendry zavamaneno izy, ny alahady 28 Jona 2015, no nankalazany an'Andriamanitra noho izany Jobily faha-25 taona namorongan-kira sy nitendreny zavamaneno izy. Mpanentana ihany koa amin'ireny lanonana kristiana ireny ary tena havanana amin'ny fanaovana izany. Mpikiraka fanamasam-peo ihany koa ary nahavita ny fiofanana manokana ny amin'ny fanamasifam-peo "numérique" izay tena takian'izao vaninandro izao izy.

Mamorona hira ho an'ireo Antoko Mpihira mila izany izy, ary efa maro ireo Antoko Mpihira mihira ny hira noforoniny. Ankoatra ireo Antoko mihira voalaza ireo, dia manana ny antoko Mpihira izay azy manokana izy dia ny Groupe ACACIA, izay marihana etoana fa izy ihany no mamorona ny hira hirain'izany Groupe ACACIA izany.

Endrika hafa izay tena ilain'ny fiafaha-monina ankehitriny ny tontolon'ny hira sy mozika ary ny dihy ary izany indrindra no trandrahan'ny Mpitandrina Rabetokotany Miarilaza Andriamialy, entiny itoriana ny Filazantsara ankehitriny.

Rojo RAMARO



Ny Mpitandrina sady mpanatalenta Rabetokotany Miarilaza Andriamialy.

Radio Fahazavana Famaranana ny jobily faha-25 taona

Telo no hafatra tamin'izany :
1. Tonga ny Fahazavana.
2. Mitsangana ianao. 3. Mihamavà ianao.

Jesoa Kristy no fahazavan'ny olona rehetra sy manontolo. Ny antoko mihira Ny Riampeo no nanafana ny fotoana ary nisy ny fandraisam-pitenenana nentin'ny Talen'ny AFIFAB Rtoa Tantely Razafimalala, ny filoha mpanampy ny faha-25 taonan'ny Radio Fahazavana ary ny filoha mpanampy ny Birao ny mpiandraikitra Foibe Atoa Razrasoa Timoty.

Ny volana Janoary 2022 tao amin'ny FJKM Andrainarivo



Famaranana Jobily faha-25 taonan'ny Radio Fahazavana

Fahasoavana no nanokafana ary ny volana Septambra tao

amin'ny FJKM Ambatonakanga no ivon'ny fankalazana.

Rojo RAMARO

Redon-kira protestanta

Nohiraina ireo hira tsy mahazatra ny fiangonana ao amin'ny tiona FFPM

Natao ny Alahady 19 Febroary 2023 tao amin'ny FJKM Andrainarivo Fahasoavana tamin'ny 2 ora sy sasany ny Seho "Redon-kira Protestanta" na "Festival de Cantique Protestante". Seho andiany faharoa tamin'ny Redon-kira Protestanta izay fanamarihana ny faha-25



Naredona ny hira tao amin'ny tiona FFPM nataon'ny antoko mihira

taonan'ny Radio Fahazavana. Miisa 21 ireo Antoko mihira nandray anjara : Anjomara Anosivavaka, Taniketsan'Amboin'AMPAMARINANA, Antoko mihira Analamahitsy, Betafо Fanavaozana, Feo Fanantenana Mandrosoa Ilafy, Antoko mihira Avaratr'Andohalo, AMAF, Antoko mihira Andravoahangy Fivavahana, Chorale Ambohitantely, Hasin'ny Famonjena , STK Anosizato Hebrona, STK Anosipatrana, Feon'ny Finoana An'Ambohilalana Finoana, Riam-peo Ambatobe, Tsanta Fiderana Ambatoroka, Taraphazavana Faliarivo Ambanidina, Antsan'ny Fanantenana Ambohijanaka (AFA), ATAM, Amboaram-peo Tranovato Anjanahary Martiora, Aina Ambohipotsy, Tsantan'Imahamasina, Amam Andrainarivo.

Tsara no manamarika fa ireo hira tsy mahazatra ny fiangonana, voarakitra ao anatin'ny Tiona FFPM no nohirain'ireo antoko mihira tamin'io fotoana io toy laharana 99, 236, 192, 699, 279, 474, 442, 241, 80, 550, 51, 169, 550, 54 sns.... Ny

Rojo RAMARO

TONONKALO

**RY FITANDREMANA FIANCONANA
F.J.K.M Ankadifotsy
"Velona ho an'ny Hafa"**

Etsy kely ange, Tsaroanao ve ?
Fa,
An'i Jesoa isika, ka
Aoka ny fiafiana sy ny fisainana
Mba haneho hatrany ny maha izay antsika.

Isika no fiaratra sy tena fitaratra,
Manaiky, mankatoa ny baikon'ny Tsitoha.
Dia,
Ny hifanasoa, hanao fanampoa marina tokoa.
Mba ho tena vavolombelon'i Jesoa.

Ka ny fitiavana ny tena,
Dia, fitiavana ekena,
Itiavana ny hafa.
Tsy asiana samy hafa.
Manjary teny velona sy
Mampandeha ny fiangonantsika,
Sahy ijoroantsika.

Ilay teny hafa kely,
Efa tena miely amintsika
Ankadifotsy.
Toa mandrotsirotsy, fa
Velona ho anao aho.
Velona ho ahy ianao.
"Velona ho an'ny Hafa" isika.

Ka ny mpiray finoana,
Ho iray fanampoa.
Hanao famehana amin'ny
Asa izay atrehana.
Ny an'ny hafa aloha fa,
Ny antsika faharoa.

Izay no lasa tarigetra,
Hajain'ny rehetra.
Ka ny asa vita nimasoantsika.
Ny bainga izay vovadika
Sy,
Ireo izay mbola ho sisa.

Manaporofo hatrany. Fa,
Isika tsy mivadika amin'ny fanekeka. Sy ny
teny izay nomena.
Natao tamin'ny fo,
Natrehan'i Jesoa.

Izay no fitiavana, ka
Etsy ange rahavana.
Ry Ankadifotsy,
Aoka isika hifankatia.
Ka rehefa tia dia
Aoka ho tena tia.
Fa tsy hifampihatsara-velatsihy.

Satria mantsy ny Fitiavana dia,
Hery tena mampihavana antsika samy isika.
Ao amin'ny Jesoa dia,
Ilay Mpamony Tompo koa.
Izy no Tsitoha,
Hery mpampiray
Amin'Andriamanitra Ray.

Ho famaranana dia,
Handeha hifandray tanana,
Fa tena mpinamana.
Ho iray fo, vavomobelone'i Jesoa.
Ka tsy misy hafa fa,
Samy "VELONA HO AN'NY HAFA".

Hantano
Mahatony, 25 february 2023 t@ 7ora 30 minitra.
Ho an'ny FJKM Ankadifotsy. CCI IVATO.

MAZOTOA HOMANA

Donuts

Zavatra ilaina : lafarinina 250g, atody 1, siramamy 60g, levure iray sotro fihinanana, ronono 10cl, sira iray tsongo, dibera 10g ary sucre glace.



Fomba fikarakarana azy : Atambaro ny lafarinina sy ny sira ary ny levure. Kapohy ao anaty lovia jobo ny atody sy ny siramamy. Afanganoy amin'ny atody sy ny siramamy avy eo ny ronono sy ny dibera efa natsonika mialoha, dia alefaso ilay fangaro miaraka amin'ny lafarinina avy eo. Atokano mandritra ny ora 2 avy eo io fangaro io. Ataovy borbory misy lavaka eo ampovoany ny endriny, dia endaso amin'ny menaka mafana tsara. Fafazo sucre glace avy eo amboniny. Vonona ny sakafio, ka mazotoa homana indray àry !

R.Sidonie

Samihafa

Fianjaika



R. Sidonie

Ny Akondro

Ireo otrikaina sy izay mety ho hita ao amin'ny akondro :
A – B6, B9 – C – E – CALCIUM – CUIVRE – FER – FIBRE – MAGNESIUM – MANGANESE – POTASSIUM

...

Ireo soa azo avy amin'ny fihinanana akondro :

- Manatsara ny kalitaon'ny torimaso
- Mampitony ny raritsaina sy ny haviganan'ny atidoha
- Manampy amin'ny fiasan'ny tsinay
- Manampy amin'ny fivalanana
- Manampy amin'ny fiasan'ny fo
- Manatsara ny fahitan'ny maso
- Tsara ho an'ny olona manana tosidrà ambony
- Mampidina ny tahan'ny menaka ao anaty rà
- Manakana ny mety ho fahatapahan'ny lalandrà



- Miady amin'ny homamiadana
- Miady amin'ny tsy fahampian'ny rà
- Mandrindra ny lanjan'ny vatana

- Manatsara ny hozatra
- Manatsara ny hoditra ho salama sy tanora landava
- Miaro ny sela tsy ho harafesenia
- Manampy amin'ny fandovanon-kanina
- Manampy ireo olona voan'ny Alzheimer

Voankazo misy mandavan-taona ny akondro. Maro koa ireo fomba azo atao amin'ny fikarakarana azy. Maro ihany koa ny tombotsoa azo amin'ny fihinanana azy. Koa dia mazotoa ary mihinana akondro.

Fanja RAVELOARIJAONA

5mn FAHASALAMANA

Atherome

Antony iray miteraka aretin'ny lalandrà sy ny fo no andeha hifampizarantsika. Ny AATHEROME dia fiangonana na fitobiana tavy / grasse na vatosokay / calcaire na rà mivaingana / caillot ao anatin'ny lalandrà ka miteraka fahakele-zana hatramin'ny fahatsetsenan'ny lalandrà mihitsy aza.

• Ny aretina aterany amin'izany dia :
• Ao amin'ny lalandran'ny LOHA dia ny Accident Vasculaire Cérébral (AVC)
• Ao amin ny lalandràn'ny fo dia ny ATTEINTE CORONARIENNE miteraka ny ANGINE DE POITRINE sy ny INFARTUS DU MYOCARDE

• Ao amin'ny lalandràn'ny tongotra dia ny Artériopathie Oblitérante du Membre inférieur (AOMI). Marary ny ranjo izay voa, rehefa mamindra. Raha tsy voatsabo tsara, dia mety harary ny ranjo na rehefa matory aza. Mety hifara amin'ny fahamanganan'ny rantsan-tongotra, ka azo lazaina hoe maty mihitsy aza satria tsy tonga any intsony ny rà.

Ny mahatonga azy

- Misy antony TSY AZO IALANA :
- Ny taona : rehefa mitombo ny taona,

dia miha-antitra ny lalandrà, miharatsy ny fikorianan'ny rà ka mora kokoa ny fitoronañ'ilay AATHEROME ;

• Ny tarazom-pianakaviana / Hérédité : Raha misy olona ao amin'ny fianakaviana efa voan'ny aretina, dia tokony hitandrina ny taranany.

• Misy ny antony AZO SOROHINA TSARA :

- Ny tosindrà miakatra
- Ny diabeta
- Ny hatavezana. Azo lazaina ho matavy ny olona iray rehefa mihotra ny 23 ny Indice de Masse Corporelle na IMC kajiana amin ny alalan'ny :
- Ny rarintsaina / stress
- Ny tsy fihetseham-batana / sédentarité
- Ny zava-mahadomelina : sigara, paraky

Ny fisorohana azy dia manohitra ny antony mahatonga azy

Miaina ara-pahasalamana

- Misakafo ara-pahasalamana :
- Legioma sy voankazo sahaza no hohnina
- Hazandrano no atao laharam-pahamehana fa tsy ny hena

- Tsy mihinana hena matavy
- Tsy mihinana sira sy siramamy be loatra

• Manao fanatanjahantena : manao sport mandritra ny ora 3 isaky ny herinandro (lomano, dia an-tongotra, lalao baolina...)

• Fehezina araka izay azo atao ny rarintsaina. Isika dia kristianina. Hoy i Jesoa Kristy ao amin'ny Matto 11 :28 « Mankanesa aty amiko, ianareo rehetra izay miasa fatrata sy mavesatra entana, fa Izaho no hanome anareo fitsaharana. » sy ny Ohabolana 23 : 26

• Fadiana ny zava-mahadomelina izay antony voalohany indrindra miteraka azy. Tsarovy fa masina ny tempolin'Andriamanitra dia isika izany araka ny I Korintiana 3 :17b « fa masina ny tempolin'Andriamanitra, dia ianareo izany ». • Raha misy aretina mitaiza, dia arahana tsara ny toromarky ny mpitsabo

Ny fikolokoanao ny vatanao dia fajajanao sy fanomezanao voninahitra ny tombo andriamanitra izay nomeny anao ho voary tsara.

HERINANDRON' NY FIANAKAVIANA

Miverena amin'Andriamanitra mba hananana fiaianam-pianakaviana mirindra

Manomboka eo amin'ny fanambadiana ny fanorenana fianakaviana. Nohamafisina nandritra ny « Herinandron'ny fianakaviana » tamin'ity taona ity, fa samy manana ny andraikiny mba hampilamina sy hampirindra ny fiaianam-pianakaviana na ny Ray aman-dreny na ny zanaka. Antoka iray ahazoana izany fianakaviana milamina izany ny fiverenana amin'Andriamanitra ilay Loharanon'ny fiaianana.

Amin'izao fotoana izao dia miova ny fiaraha-monina misy antsika, lasa fiaraha-monina mamono olona, fiaraha-monina mijangajanga, tsy mahagaga sy tsy maharotrota intsony izany hoe misara-panambadiana izany. Las a tsy manaitra ny olona intsony izany na dia fianakaviana kristianina aza.

Anisan'ny fandaharan'asan'ny FJKM ny « Herinandron'ny fianakaviana » hampitodika indray izany fianakaviana izany amin'ilay Andriamanitra Nahary antsika, nanorina izany fianakaviana izany, ka mba ho tokantrano mahatamana izany tokantrano kristianina izany. Anisan'ny hananteraka izany ny teto amin'ny FJKM Ankadifotsy namomboka ny alatsinainy 13 Febrero hatramin'ny zoma 17 Febrero 2023, isaky ny tamin'ny 6ora hariva.

« Ho fanambadiana tsara fototra sy mafy orina amin'ny



Iriana hisy fiantraikany amin'ny fianakaviana kristiana ny fampianarana

Tenin'Andriamanitra », io no lohahevitra nentin'Andriamatoa Ravelosoa Andriamananjy Michaëla, mpitandrina avy ao amin'ny FJKM Katedraly Analakely, ny alatsinainy 13 Febrero 2023.

Ny lehilahy sy ny vehivavy no miara-manao fanekena amin'Andriamanitra amin'ny

fanamasinana ny fanambadiana. Manomboka eo dia fomba fiaina kristianina no iai-nan'ny mpivady. Ny lehilahy sy ny vehivavy dia miaramao "engagement". Tsy vady kisendrasendra tetzy sy teroa no notsimponina, fa ho vady sahaza izay hanana fiombonam-piaianana feno.

Inona no azo tsoahina amin'izany ?

Mila fahatokiana an'Andriamanitra na eo aza ny fahoriania sy ratram-panahy satria Andriamanitra manome valiny mahasoa ho antsika. Mila mitazona ny finoana an'Andriamanitra ka tena ho vehivavy sahy mijoro.

Miatomboka any amin'ny Ray aman-dreny ao amin'ny tokantrano no fanombohana ny fiaianana, izany hoe zanaka niriana, any no fiandohan'ny fahendrena, mahalala ny atao, mahay mandanjalanja.

Endriky ny fitondrentana takan'ny fiaraha-monina dia ny ankizy sy tanora mahay manakatoa, manaja ny Ray aman-dreny, tsy mandainga, tsy mangalatra, madio fitondran-

Raha hain'ny mpivady ny mitoetra amin'ny fahasoavan'Andriamanitra araka ny fanekena nataony, dia tena antoky ny faharetan'ny fanambadiany ny nanorenanana ny tokantrony.

Tadidio fa mifamatotra sy mifandroy ary indrindra miorina ao amin'i Kristy ny fanambadiana kristianina. "Ary noho izany ny lehilahy dia handao ny rainy sy ny reniny ka hiray amin'ny vadiny, dia ho nofo iray izy roroa". Mila tsara fototra sy mahalala tsara ny Tenin'Andriamanitra izy roa. I Kristy no lohan'ny fiangonana, ka noho izany, amin'ny fanambadiana ihany koa dia ny lahy no lohan'ny vavy.

Nanitrikitra ny mpitandrina fa tsy eken'Andriamanitra ny fanambadian'ny lahy sy ny lahy ary ny vavy sy ny vavy, satria izany no nandrangan'Andriamanitra an'i Sodoma sy Gomoro.

Tena, tsy manandrakandrampoana, mahay mifehy tena. Ny olon-dehibe kosa indray, dia mahay mandanjalanja ny atao, mahay mitady, mitandrina ny marina, manam-panahy ary mitondra ny ankohonany amin'ny fahendrena.

Enga anie ho vehivavy Hendry, mendrika, tsy hanisy fanavakavahana isika ao amin'ny ankohonana, ka hanana fanetren-tena. Mila mijery ireo vehivavy hendry, manana finoana an'Andriamanitra ao amin'ny Bailey mendrika ny halain-tahaka isika, mba ho vehivavy hendry sy mendrika mandeha araka ny tenin'Andriamanitra, ho fitahiana ho an'ny ankohonana.

•

"Ho vehivavy hendry sy mendrika mandeha araka ny tenin' Andriamanitra ho fitahiana ho an'ny ankohonanay" io no lohahevitra nodinana ny alarobia 15 Febrero notarihan-dramatoa Razafindramiara Vololontsoa Hanitriniaina, Mpitandrina sady Talen'ny Sekoly FJKM Anosizato Andrefana.

Ny vehivavy mendrika manana fahendrena tsara alaintahaka dia fitaovana teo anatrehan'Andriamanitra ho famonjena ny olona rehetra. Voalaza teto fa misy vehivavy maro voatanisa ao amin'ny To-nonkirain'i Solomona, izay vehivavy tso-piaianana ary tsara tarehy, nitia mpiandry ondry na dia notadiavin'i Solomona alaina aza izy dia tsy nanaiky niala tamin'ilay olon-tiany.

Andriamatoa Rafalimanana Camille, avy amin'ny FMMB no nizara fampianarana ny alakamisy 16 Febrero, ka novelabelarina tam'inzany ny hoe : « Ray aman-dreny mahay manabe sy mitarika ny zanana ho fehezin'ny Tenin'Andriamanitra ».

Maro ny Ray aman-dreny no mampitomany ny zanaka amin'izao fotoana izao satria mandiso fanantenana. Dada natao modely, neny natao loharanom-pitiavana lasa loharanom'ny krizy. Antsoina ny Ray aman-dreny hanabe sy hanafay ny zanaka, tsy azo ahilika amin'ny olon-kafa izany. Jereo fa any an-dafy any, dia mijaly ny Ray aman-dreny, satria ny zanaka indray no mibaiko sy manafay azy ireo.

Tadidio ary fa raha mbola mipetraka ao amin'ny Dada sy neny zanaka dia azy ireo ny fahefana, ny zanaka tiana no tsy itsitsiana tsorakazo. Ny baiboly dia mameetraka fa ny Ray aman-dreny dia manana adidy amin'ny fanebeazana ny zanaka. Ny fitaizana ny zanaka

dia tsy izay teninao no manan-danja aminy, fa izay ataonao. Tadidio tsara fa izay hitan'ny masony no averin'ny ankizy atao. Karaha mpivady mpifaninana no hitany, dia izay no averiny, fa raha mpivady mahay manao ekipa iray no tazany, dia izay no alainy tahaka. Ny modely aseho no manan-danja kokoa ho an'ny zanaka noho izay teny lazainao. Ny Ray aman-dreny no lasitra voalohany mamolavola sy manabe ny ankizy, io no manefy azy ka raha ao no tsy mila-mina, dia mivaralila ny fanebeazana rehetra.

Samy mandalo olana daholo ny tokantrano, na mino an'Andriamanitra na tsy mino Azy, saingy hafa kosa ilay tokantrano miorina ao amin'ny Tompo. Na mandalo olana aza, tsy mirodana fa mifikitra mafy amin'ny Tenin'Andriamanitra. Mila manontany tena ny Ray aman-dreny, « Modely manao ahoana no ampitaina amin'ny taranaka faramandimby ? ». Mila miverina amin'Andriamanitra isika izay vao afaka mitsinjo ny zanatsika. Izay ny faniriana hoe : « Mpivady miverina amin'Andriamanitra » mba tsy

ho mpivady miady lava. Ry ray aman-dreny ô, mivavaha ho an'ny vadinao, miaraha mivavaka dia miara-mandresy iana-reo, ary mba hanana tokantrano modely an'ny taranakareo.

Fanamby ampitaina amin'ny zanaka ny Tenin'Andriamanitra hoe : « Raha izaho sy ny ankohonako dia hanompo an'i Jehovah izahay ». Marina fa tena krizy izao ny fiaianana, ry Ray aman-dreny, fa aza manao adaladala, anehoy fitiavana izy fa rehefa feno fitiavana ny mpivady, dia hitan'ny zanatsika izany. Rehefa mafy orina ny fanambadiana dia milamina ny tokantrano, ka mamy ny mody ao an-tokantrano. Aseho amin'ny zanaka fa mpivady mahay mifandefitra ny Ray aman-dreny, tena ilaina ampianarina ny tanora amin'izao izany fandeferana izany, toy ny nandeferan'ny Tompo tamintsika ny fahotantsika ary namoizany ny ainy mihitsy aza.

Samy manana fahalemena avokoa ny olombelona rehetra fa izao : ny zavatra tsara amin'ny vadinao jerena, mafy azy aza ianao, dia ha-hasoa azy izany.

Hoy ny Baiboly hoe : « Zaro amin'ny lalana tokony halehany ny zaza fa na lehibe aza izy tsy hiala amin'izany », sarobidy izany mba hahazoany fahombiazana ka na miteny mafy azy aza ianao, dia ha-hasoa azy izany.

"Ho lehilahy matotra sy tompon'andraikitra mampiadana ny vady aman-janany araka ny baikon'ny Tompo" no-tarihan' Andriamatoa Ravaloson, Mpitandrina FJKM Ankadifotsy, niarahina tamin'ny Fikambanana "Saha Edena" ny talata. Tokantrano manao ahoana no haorintsika? Io no fannontaniana novelabelarina tam'inzany. Tokantrano sy fianakaviana feno fahasoavana araka ny sitrapon'Andriamanitra no tokony hijoroan'ny tokantrano. Ankoatra izay, dia ny fahatorana an'i Jehovah no antoky ny fahalavorarian'ny tokantrano, tsy mantsy mitady ny fanatrehan'Andriamanitra ny lehilahy, mba ho lehilahy matahotra an'Andriamanitra ary mandeha amin'ny lan'an'ny sitrapon'Andriamanitra. Manome toky sy miantoka ny fivelomantsika Andriamanitra rehefa matoky Azy ary dia ambinivy. Mila mankatô ny Tenin'ihany koa hahatanteraka izany fanambinana izany.

Ireo toetra tokony hanan'ny raim-pianakaviana:

- Autorité : andry eo amin'ny fianakaviana, aro, hery ho an'ny fianakaviana

- Affection : tena fitiavana dada, azo antenaina

- Affirmation : mankahery, manome teny mamy

- Présence : fanatrehan'ny dada amin'ny fotoana rehetra

Amin'ny fomba ahoana no hahatanteraka izany?

Misy zavatra takiana aminao dia 1- Mandinika tsara izay zavatra rehetra atao. 2- Mila mihaino an'Andriamanitra (capacité d'écoute), mamantatra izay tian'Andriamanitra aleha, mihaino ny hetaheta izay ilain'ny ankohonona, noho izany mila mahay mampiasa ny vavahadin-tsaina. Mila mampiasa ny sofina, ny maso, ny orona, ny saina. 3- Fahaizana mandresy lahatra ny ankohonana fa tena raim-pianakaviana. Mila mahatohitra ny fakam-panahy, ny vady nomen'Andriamanitra anao dia mifantentana sy sahaza anao. Mahaiza mifaly amin'izay vady nomen'Andriamanitra anao. 4-Raim-pianakaviana resy lahatra fa izy no mitondra ny ankohonana: ao anatin'ny fahamarinana, toe-panahy araka ny sitrapon'Andriamanitra hanomana ny mandrakizay ho an'ny fianakaviana. 5- Raim-pianakaviana mitondra fampaherezana ho an'ny fianakaviana, mitondra fitaliana, manakahery, manastrana, mizara fitiavana. 6- Dada mandray andraikitra : mahafoy fotoana, tena, mahafoy ny zavatra rehetra, mahafoy ny tsara ho an'ny ankohonany.

Ny zoma 17 Febrero dia ny Mpitandrina Ranaivoniarivo Tiana Alisoa ao amin'ny FJKM Atsimon'Imahamasina no nitondra ny fampianarana niompana tamin'ny lohahevitra hoe : « Ho zanaka manaja sy mpankato ny Ray aman-dreny araka ny didin'Andriamanitra ».

Nanitrikitra ny Mpitandrina Ranaivoniarivo Tiana Alisoa tam'in'ity fotoana ity, fa raha tiana hankato ny Ray aman-dreny ny zanaka, dia mila zarina hatahotra sy hankato an'Andriamanitra aloha. Alaina tahaka amin'izay fankatoavana an'Andriamanitra izay ny fana-jana ny didy folo izay milaza hoe : « Aza manana an'Andriamanitra hafa afa-tsy Izaho, manajà ny Ray sy ny reninao, aza mijangajana ... ». Raha amin'ny teny hebreo dia tsy misy hoe « AZA », satria tsy mandrara akory ny Tenin'Andriamanitra, fa mampianatra antsika mba ho zary lasa fiaianana izany fankatoavana izany. Araka ny fankatoavantsika Ray aman-dreny an'Andriamanitra no hankatoavan'ny zanatsika antsika. Raha nanaiky teo ambony alitara ny Ray aman-dreny fa hampiditra ny zanany Sekoly Alahady, dia tanteraho izany. Raha nanaiky fa hamaky baiboly isan'andro, dia efao izany.

Ankoatra izay, dia ny fametrahana ny zaza hanana ny sandany ihany koa dia mahatonga ny zanaka hankato ny Ray aman-dreny. Ataovy toy ny mitondra olon-dehibe ny mitondra ny zanaka, dia hankato anao izy. Rehefa atao an'izay ny fanabeazana azy, dia tonga amin'ny fivelarana izy, ary ho fantany ny tokony ataony.

Tadidio fa tokony hanana « capacité d'écoute » ny Ray aman-dreny. Rehefa mba miteny na mananatra ny zaza, dia henoy izy, ekeo izy, misy fotoana mba mihaino ny zanaka koa ny olon-dehibe. Tsarovy fa Andriamanitra koa rehefa manabe dia mihaino anao, ataony amin'ny alalan'ny vavaka izany.

Tandremo ny mandainga amin'ny zanakao, lazao aminy ny marina, aza ampitahorina izy. Mampiasa fiteny « MIABO » rehefa manabe, ary omeo fankasirahana ny zanaka rehefa mety ny ataony.

Maro ny Ray aman-dreny no « miompy » fotsiny amin'izao, fa tsy « mitaiza ». Izany hoe manome vola fotsiny, miditra dia mivoaka ny trano, fa tsy manabe. Tsy mantsy ahitsy afeha izy rehefa diso, kapohy amin'ny fitiavana fa tsy amin'ny fahatezerana. Asio fifampiresahana am-pitavana ao an-tokantrano mba hivelarany ankizy. Raha tianao hankato anao ny zanakao, dia fidio ny namana mafy azy, « izay miaraka amin'ny amboalambo dia amboalambo ».

Tadidio ary fa manomboka amin'ny Ray aman-dreny ny fankatoavana. Ny fanabeazana kristianina dia manomboka hatrany ambohoka, miorina amin'ny fitiavana « Fitavana mandrakizay no nitiavako Anao ». Mandram-pikimpy ny maso dia manabe foana, raiso toy ny olon-dehibe ny zanaka, ka avelao izy hivelatrat. Ataovy izay hisian'ny fitokisana, dia mipetraka ho azy ny fankatoavana.

Fanamby apetraky ny FJKM tam'in'izao Herinandron'ny fianakaviana izao ny hoe : « Fanambadiana mafy orina, sy tokantrano milamina ary fiaianam-pianakaviana mirindra eo ambany fahfan'ny Tenin'Andriamanitra ». Mba ho tokantrano hanjakan'Andriamanitra tokoa ny tokantrano kristianina rehetra, ka ho ankohonana sambatra, mba hahafinaritra izany miaina ao an-tokantrano izany taorian'ireo fampianarana ireo.

Hanitra Malalasoa, Tojo R.

DADAMIZA 90 taona**Ny fiainam-bavaka sy ny fianakaviana ary ny fihavanana no tena sarobidy**

ANDRIAMANANTOAINA Jean Célestin no Anaranay. Teraka tamin'ny 04 febroary 1933 teto Antananarivo. Manambady an-dramatoa Rasoarivelo Claudine Aimée, manan-janaka 3 mianadahy, manan-jafikely 4 (ka ny 2 samy efa manambady) ary manana zafiafy 3. Mpissan'ny "Trésor Public" Malagasy misotro ronono

Voataiza ara-panahy teto amin'ny fiangonana FJKM Andrikafotsy hatramin'ny fahazany. Tao izy no natao batisa sy noraisina ho mpandray ny fana-san'ny Tompo ary notokanana ho diakona. Zanaka mpitandrina.

Mpamoronkira, mpampiana-tra hira, mpitrika antoko mpira-hira, mpitendry zava-maneno izy.

Ireo sampana nisy azy tao amin'ny fiangonana :

Izy dia anisan'ireo

- Mpikambana nanangana voalo-hany ny TILY 17e Ankadifotsy (Patrouille Vorombola no notari-hany tamin'izany)

- Mpikambana namorona ny sampana VONDRONA FOTOTRA LAIKA teto amin'ny fiangonana ihany koa niaraka tamin'ny Rantoanina Gilbert ralahaliny, Filohan'ny "Vaomieran'ny Vola sy Asa ary Orinasa" no andraikiny tamin'izany.

- nanangana ny TANIKET-SAN'NY MPIHIRAN'NY FARIMBONA niaraka tamin'I S.A.D Ramarokoto sy Elizah Andriamanantoanina

- nitarika ny MPIHIRAN'NY FARIMBONA ary ny MPIHIRAN'NY FARIMBONA ZOKINY

- Komit'in'ny Farimbona.

- Nampivondrona NY MPITENDRY ZAVA-MANENO teto

amin'ny fiangonana izy mana-fana ny fotoam-pivavahana sy ireo fotoan-dehibe.

Nentiny niderana sy nandraisany anjara tamin'ny asa fanompoana an'Andriamanitra ny talentany

Hiram-pivavahana anisany noforoninny voalohany dia "Izaho Ry Jesosy".

Ny hirany "Tompo Malala" dia voarakitra ao amin'ny fihi-rana fanampiny (FF.34)

Tsy vitsy koa ireo hira noforoninny ho an'ny Mpihiran'ny Farimbona toy ny "Injany misy feo, Hosana, Ny dian'olomboavonjy, Dia ho tranon'omby ihany ve, Haleloia ..."

Mpampianatra sy mpitendry ny hira ho an'ny dorkasy teto amin'ny fitandremana Ankadi-fotsy izy. Nisy ihany koa ireo hira noforoninny ho an'ny Dor-kasy sy ireo noraisina ho mpand-ray ny fanaasan'ny Tompo.

Tsy navelany ho diso anjara koa anefea ireo tanora tamin'ny hira ho an'ny piesy teatraly kris-masy (hiran'i Heroda, hiran'i Maria, hiran'ny anjely, hiran'ny mpiandyre ondry...)

Mbola zo talenta nomen'ny Tompo azy io hirany koa no nentiny nanangonany ireo namana tompon'andraikitra sy mpiaramiasa kristianina tao Antsiranana ho toy ny antoko mpihira kely izay nanao fitadiavam-bola nananganana trano fiangonana tany Namakia. Torak'izany ihany koa ny hetsika notanterehina nami-tana ny fiangonana FJKM Betela Tanambao V Toamasina (izay niarahanay tamin'i Randrianasolo - Tarika Voanio).

Izay toerana rehetra nololovany (Antsiranana, Faradofay, Toamasina, Antananarivo) amin'ny maha-mpiasa-panjakana

azy dia nanehoany ny talentany avokoa ho amin'ny fiderana sy fitaomana an-kira ho an'Andriamanitra.

Ankoatran'ny hiran'ny fahatanorana, dia namorona hira nentina nankalaza fanambadiana ihany koa izy toy ny "afakafaka aho mahita", "Ity no andro saro-bidy" sy ny maro hafa.

Tsy nandalo fianarana mo-zika izy fa nampiana-tena tamin'ny fitendrena harmonia izay nananan'ny ray aman-dreniny tao an-trano.

Tena zava-dehibe ho azy ny fanomanana sy fanaovana fame-renana in-2 farafahakeliny mia-loha ny alahady itendrena ary efa voamany daholo ho an'ny mpitendry ny dika mitovy ho an'ny hira rehetra ho tendrena.

Ho an'ny zanany dia mody ho azy ireo Dadamiza mi-vady satrila tsy nisy alahady iray tsy nahitana azy tany am-piango-nana raha mbola salama ihany koa izy mivady ary voataiza tao anaty mpihiran'ny farimbona daholo ny taranany

Ny tena fialiany dia ny ma-hita ny ankohonan tafavory. Olon'ny ankohonana izy, ary tena mampihanta zanaka. Tsara fanahy sy be fitiavana. Isan-kariva dia tsy maintsy voanontaniny tsirairay ireo zanany sy zafikelyna eo efina tonga ao an-trano na tsia, izay vao matory izy. Malala-tanana sy be fitiavana izy, tsy ho an'ny ankohonany ihany fa na ho an'ny namany sy ny mpiara-monina aminy. Raha mbola misy ny mitaraina tsy manana dia tsy maha-fhey tanana izy. Be hatsikana sy be vazivazy koa izy ary tena tia mihomehy.

Mahalana no ahitana azy te-



zitra, ary na tezitra aza izy tsy manoka-bava na mikapoka fa ny endrin sy ny masonry mijery no ahatarafana ny hatezerany. Ny miteny ratsy no tena mahatezitra azy.

Hafatr'i Dadamiza

Tsara avokoa, hoy izy, ny te-nin'Andriamanitra fa ny "Salamo 103" no tena naharesy lahatra ahy, ary ny hira tiako dia "Ry Jesosy mba tantano" - FFPM 630

Ny fiainam-bavaka sy ny fia-nakaviana ary ny fihavanana no tena sarobidy amiko

Fifaliana lehibe ho ahy sy isaorako an'Andriamanitra ny mahita ny zafikeliko Andriamanantoanina Tsioray Rayan, izay nandimby ahy mitendry.

Anisan'ny filamatra ape-trany eo amin'ny tontolo-pia-nany ny hoe : "Rehefa manao zavatra dia tokony ho tsara fano-manana sy mirindra ary voala-mina mialoha".

Ny "henomby ritra" no laoka ankafiziny, ny mitendry zava-maneno sy mijery baolina kitra ary indrindra indrindra ny rugby ao amin'ny tél no fialamboliny

Fanja RAVELOARIJAONA

Izahay no hoavin'ny fiangonana

Lita, zazalahikely mpianatra Sekoly Alahady, mbola tsy mahato-kan- dalana izy rehefa mandeha any am-piagonana, raha tsy misy olon- dehibe miaraka aminy, na dia mazoto aza.

Ny reniny no mitondra azy indraindray, saingy rehefa mahazo le-sona izy any amin'ny sekoly Alahady, dia tsy tonga intsony raha tsy manao fanadinana indray. Toy izany ihany koa rehefa mianaran-hazo krismasy, rehefa mahazo tsianjery, dia tsy miverina raha tsy andron'ny noely.

Hoy izy hoe: tsy maninona hono izany hoy ny re-niny, satria izy mbola kely, sady tsy misy bedy koa aty am-piagonana. Ny Oha 22: 6 dia mivaky toy izao: "zaro amin'izay lalana tokony halehany ny zaza, ka na rehefa antitra aza izy dia tsy hiala amin'izany."

Tsy nijanona ho zazakely foana i Lita, fa na efa na-hatokan-dalana aza izy, dia tsy niala tamin'ilay fomba ratsy nanazarana azy ihany.

Rehefa lehibe izy, dia tonga mpandray ny Fana-san'ny Tompo. Tonga mpampianatra sekoly Alahady ihany koa, saingy zarainy lesona ny mpianatra, dia tsy hita izy raha tsy efa mam-paona fanadinana indray; mazava ho azy fa tsy tonga mivavaka izy raha tsy amin'ireo fotoana ireo.

Lany diakona ihany koa izy, saingy raha vao mirava dia lasa, tsy hita manisa rakitra akory, zara raha mamonjy fivoriana. I Lita izany



eto ilay lazaina hoe manao tsidi-pahitra, izany hoe: "mandalondalo kely, tsy mijanona ela, tonga ihany fa indraindray."

Raha izay no tantaran'i Lita!

"Ianareo no hoavin'ny fiangonana, rankizy sy tanora rahatrizay." izany hoe:

Ireo zoky rehetra mizarazara any anaty sampana, sampan'asa, fikambanana any, mampandroso ny fiangonana amin'izao fotoana, dia tsy ho eo foana; ianareo no mandimby ny asa fanompoana ataon'izy ireo rahatrizay.

Ny sasany ho lasa mpampianatra sekoly Alahady, ny hafa ho diakona, ho pasitera....

Noho izany, tsy atao tsidi-pahitra ny fiangonana sy ny fianaranana Soratra Masina satria io no fototry ny asam-panomoana rehetra atao rahatrizay; dia ny fitoriana ny filazatsaran'i Jesoa Kristy.

Tiana ho tafalatsaka ao am-ponareo, rankizy, ny hoe : "Izahay no hoavin'ny fiangonana rahatrizay."

Indro misy tsianjery mampahatsiaro antsika izany:

Tsy manao tahaka an'i Lita izahay,

Tonga ihany fa indraindray,

Satria "izahay no ho avin'ny fiangonana rahatrizay."

AMEN.

Malala Andriniaina.

FANABEAZANA**Ankohonana mifampihaino**

Soatoavina tena manan-danja amin'ny vehivavy ny "HENONA". Fa Andriamanitra koa anefea dia name-traka ny Lehilahy ho mpitrikira ao an-tokantrano. Sarobidy indrindra ho azy ny mahatsapa ny vadiny mihaino ny tari-dalany, manampy azy amin'izay fanapanah-kevitra raisina.

Tsy mora tokoa ny mifampihaino, tsy mitovy tsinson ny lavy sy ny vavy, fa natao hifameno. Tsy mety ny mipeetraka sy mahazo ny tian'ny lavy holazaina raha ny fomba fahao-zan'ny vavy no entina manazava ny zavatra mitranga iray. Ohatra iray : raha mamaha olana ny "lehilahy" dia tsy hozarainy aminao vadiny izany, satria ny maha-izy azy dia mifototra amin'ny fahaizany hamaha io olana io. Raha misy kosa ny "olana" dia ny mahamaika ny "vehivavy" dia ny hi-zara izany amin'ny vadiny, amin'ny namany. Ny zavatra ilain'ny vehivavy dia "tsy vahaolana" fa "fihainoana" satria mamaritra ny maha-izy ny ve-hivavy ny fifandraisana.

tiavana ny momba ny ankilany.

2. Ary aoka samy halemy fanahy amin'ny namany avy hianareo, ka hi-fampiantra sy hifamela heloka, ta-haka ny namelan'Andriamanitra ny helokareo ao amin'i Kristy. (Efe 4:32)

Andehe fiametraka eo ampototry ny Hazo Fijalian'i Jesoa ireo za-vatra, faniranana, nandrasantsika tsirairay tamin'ny vady malalantsika. Satria anio dia hisafidy isika hanaiky fa Andriamanitra, llay Dada mpam-o-rona antisika irey ihany, no afaka ma-menno izay andrasan'ny fontsika rehetra ary efa nataony teo amin'ny fainantsika izany ary mbola hataony. Koa andehe hangatoka amin'ny Tompo isika hamelatra eo anolo-antisika ny "heloka" mila hifamela ka hisitrahantsika ilay fitahiana efa no-maniny ho antisika.

Akory re ny haben'ny zava-tsos-ano voarakitra ho an'ny matahotra Anao dia izay nataonao teo anatre-han'ny zanak'olombelona ho an'izay mialoka aminao! (Salamo 31: 19)

Ny Tompo anie hanatobaka izany HATSARANY izany amin'ny ankohonantsika, ka hahatonga antisika ho Ambasadaon'i Kristy, ma-mirapiratra eo amin'ity firenena mitady fanilo hampitodika azy ireo amin'lay Ray Fitavana.

Nini RATSIMATAHOMANANA

Arahabaina

"Ary Jehovah Andriamanitra nanao hoe : tsy tsara raha irery ralehilahy, dia hanaovako vady sahaza ho azy izy." Gen.2. 18

- RAZAKARIVONY Fiaferana Andriamahery sy RASOAMIARAMANANA Ketaka Andrianina
- RAKOTONOELY Zo Radonaina sy ANDRIAMAHARY Tolotra

BATISA

« ...dia nisokatra ny lanitra, ary ny Fanahy Masina nidina teo amboniny... » Lio. 3. 22

- RAKOTOVAO José Anthonio
- RAKOTOVAO Dera
- RAVAO Dimbinaina
- RANDRIAMANANTENA Tendry
- RAKOTONOMENJAHARY Faly Nirina
- Mideraniavo Fanilo Tiasoa
- RAJERIMALALA Nekena Cathy
- RAJERIARIVONY Nomenjanahary
- RAKOTONIAINA Mihanta Fitia Ifalian'Aiko
- RAKOTONIAINA Miarotia Mamy Ny Aiko Idealy
- RASOLOFOMANANA Ilontsoa
- RAKOTOHASY Mahaliana Ny Aiko
- ANDRIANJAKALISOA Iriko
- IANKINANTSOA Razafindrainibe Samuel
- RATSIMBAZAFY Harena Niaina
- RAMISASOA Aina Mathis
- RAKOTOARISOA Ny Avo Yoanne
- KAJINIAINA Randrianarizay Mitantsoa
- ANDRIANKAJA Manitriniaina Prisca
- RABESON Henintsoa Eric
- SENDRAHASINA Nirina Cindy
- ANDRIAMANJATO Rohintsoa Isaia
- ANDRIAMANAHEFA Kaliana
- RAZAFIMAMONJY Velontsoa Eliana
- RABEMANANTSOA Amboaraliana
- RAKOTOARIVELO Anjara Fanambaninana Nomenjanahary

Fiononana

« Fa Izaho mahalala ny hevitra iheverako anareo, hoy Jehovah, dia hevitra hahatonga fiadana, fa tsy loza, mba hanome anareo fanantenana ny amin'ny farany... » Jer. 29. 11

- RALIARISON Nantenaina Kenny

TSARA HO FANTATRA

Fandaharam-potoana maro no nasiam-panovana nanomboka ny volana Aprily teo. Toy izao manaraka izao izany :

- **Ny alahady fahatelon'ny volana sy alahady voalohany** dia misy ny Fandraisana fanasan'ny Tompo koa amin'ny **06 ora sy sasany** amin'ireo fotoana ireo no fidirana voalohany .
- Ho an'ireo manana tsy salama na raiamandreny tsy afaka mamonjy fotoam-pivavahana, dia afaka milaza ao amin'ny mpandrahahara handaminana ny **famangian'ny Mpitandrina any an-tokantrano** isaky ny alakamisy.
- **Ny alahady farany amin'ny volana no anantanterahana ny Ankafoka** ka manomboka amin'ny 09 ora, Ankafoka : fanomanam-panahy amin'ny Fandraisana Fanasan'ny Tompo ary fandaminana ireo raharahan'ny fiangonana avy any amin'ny mpihevidraharaha.
- Ny **Katekomena** dia mianatra isaky ny alahady ary miditra amin'ny **2 ora hariva**
- Ireo **taratasy rehetra ampandalovina mpihevidraharaha** kosa dia ny alahady faharoa fara-fahatarany no tokony ho tonga ao amin'ny mpandrahahara
- Ny **fandraisian'ny mpitandrina ny vahoakan' Andriamanitra** dia isaky ny **Talata sy Alakamisy amin'ny 3 ora** ao am-piagonana.
- Ireo hanao **dinika batisa sy mariazy** kosa dia ao amin'ny Mpandrahaharan'ny fiangonana Atoa Ravoajanajary no maka ny dinidinika momba izany mialoha ny hihonana amin'ny Mpitandrina.

Ny fitiavana mitsipaka ny aizina

Safidim-piaianana mazava

Manify ny fiavahan'ny safidy tsara ho amin'ny lalana mazava sy mahomby ary ny firobohana ho ao anatin'ny kizo.

Raha atao hoe mahavelona sy maha-sambatra ny mahomby, dia raisina ho maha-faty sy mahavery ny kizo. Fanapanan-kevitra maro no raisina rehefa miova ny toetrandro, re-hefa tonga ny vanim-potoana fankalazana zavatra iray. Tafiditra ao anatin'ny fifadian-kanina karemy ny Kristiana amin'izao fotoana izao, ka ao ny manapa-kevitra ny tsy hihinam-kena. Maro no voataona hanao "régime", mifamporisika sy miezaka mitozo amin'izany mandram-pahatonga ny Paska.

Mampiady hevitra ny hita maso, ny hetsika ivelany ary ny fisainana sy ny fisentoana anaty. Mizara ny hevitra, ka misy ny manome vahana ny fihetsika ivelany, ary ao ny resy lahatra fa ny ao am-po tsy miloaka no zava-dehibe. "Amin'ny fo no inoana hahazoana fahamarinana, ary amin'ny vava no anekena hahazoana famonjena" - Romana 10:10. Tsy manampy hampiravina ny tsy fitovian-kevitra io andalana Soratra masina io.

Tsy entina mandravina hevitra, satria mifampitohy sy mifameno ireo asa roa avy amin'ny fo sy avy amin'ny vava ireo. Tsy ampy raha ny fo ihany, fa misy hetsika ara-batana miseho ivelany



Fahazavana tsy vidiam-bola

miaraka aminy. Mety ho tafajanona amin'ny fihizingizinana bontolo na ny milaza fa ny fo dia ampy, na ny manamafy fa ny fihetsika ivelany no zava-dehibe.

Fitsipahana ny fijangajagan-gana maizina

"Efa ho lasa ny alina, ka efa mby akaiky kokoa ny andro, koa aoka hariansika nyasan'ny maizina ka hitafantsika ny fiadian'ny mazava"- Romana 13:12.

Manalavitra ny fiderana an'Andriamanitra ny fiheverana ny tena ho zavatra, na ny fitompoana tena ho fatratra, ka hanamaivanana na hanapotehana ny fifampiakinana amin'ny hafa ary ny fankinana amin'Andriamanitra. Ny tsy fanekeha hanaiky fa afaka miasa amin'ny fomba maro Andriamanitra no tsy ahazoan'Andriamanitra toerana ao am-po, anatin'ny fia-nakaviana, ny ankohonana, eny amin'ny fiafaha-monina na mety ho ao am-piagonana koa mbà hiposahan'ny mazava.

Ny fanjakan'ny nofo dia ny fitiavan-tena, manimba ny fitiavana sy ny fifankatiavana, mitrika ho amin'ny fahavetavetana, fandrika tsy mitondra afa-tsy ho amin'ny fiainana takona. Mandray faka amin'ny nofo ny fahafinaretan'ny fiangajangana, mampaharitra amin'ny toe-panahy tsy mivoatra, tsy mahazaka fisanakalozana noho ny gejan'ny filana ara-nofo, manusika ho amin'ny fahavetavetana. Mahaso tokoa ny fiso-kafan'ny fiagonana amin'ny famelabelaran-ke-

vitra, ahafahana manavao fomba fijery, na manova fomba fihetsika, na manamafy toe-po tsara, tahaka ny herinandron'ny fianakaviana tamin'ny volana febroary lasa iny.

Zava-misy manjaka ny fampifangoana an'Andriamanitra amin'ny sampim-pijangajagan-gana, tsy atahorana ny lohasaha mangina, ka iheverana fa rehefa tsy mibaribary fa ao an-tsaina ihany ny filan-dratsy dia tsy mijangajanga. Ny maso mijery tsy mitondra mody, hoy ny fiteny, endrika fisintahana tsy ara-batana tokoa, fa ny faniriana ratsy afeniny ao anaty dia fiangajangana. Ny fisintahana hisafidianana ny aizina sy ny takona dia fanalavirana an'Andriamanitra, manafeleka ny fitiavana noho ny fanirian-dratsy viravirain'ny fanahy ratsy eny amin'ny rivotra, izay mandresy lahatra fa tsy mijangajanga raha tsy manao zavatra faritan'izao tontolo izao ho fiangajangana. Any amin'ny fitsarana moa dia re-hefa tsy misy porofo, tsy azo ambodiomby, na tsy

misy vavolombelona, kapain-tsy hita fery, dia tsy meloka.

Isaorana Andriamanitra manome ny Teni ny mampahat-

siahy ny faharatsiana, sy mitondra amin'ny fandinihan-tena mbà hanovana famindra, ho amin'ny mazava anaty sy ivelany.

"Fa itafio Jesoa Kristy Tompo, ary azo miahny amin'ny nofo hahatanteraka ny filany"-Romana 13:14.

Jocelyn R.



Jesoa Kristy Fiainana

Fintina toniteny VOLANA FEBROARY

N Y H E R Y S Y F A H E F A N ' N Y T E N I N ' A N D R I A M A N I T R A .

Alahady 26 Febroary izay nalaina tao amin'ny Ny Heb 4: 12-13 no nakanana ny hafatra.

Alahady voalohany amin'ny karemy.

Contexte : Ny toetry ny Tenin'Andriamanitra.

1. Ny Tenin'Andriamanitra dia VELONA.

> Mamelona ny Tenin'Andriamanitra satria velona. Manoloana ny fahadio-panantenana, fahakiviana, aretina, ady atrehina sns, dia mampitraka, mitondra hery, fanantenana, fahasiranana ho antsika ny Tenin'Andriamanitra.

> Ny Tenin'Andriamanitra no aoka ho betsaka ao am-pontsika mba hitondrantsika fahavelomana sy fiainana amin'ny ffanerasantsika amin'ny hafa. "...fa avy amin'ny haben'ny ao am-po no itenenan'ny vava". (Mat 12: 34).

2. Ny Tenin'Andriamanitra dia MAYERY.

- Mandaitra, tsy miandry hatak'andro, mahomby tanteraka ny Tenin'Andriamanitra rehefa iainana.

> Tamin'ny voalohany, ny tany dia foana sady tsy nisy endrika (nikorontana), rakotra haizina, saingy rehefa NITENY Andriamanitra dia niova izany ka nisy fahariana (Gen 1).

> Na inona na inona endrika korontana, haizina, eo amin'ny fiainana, rehefa itsofahan'ny Tenin'Andriamanitra izany, dia tsy maintsy miova sy milamina.

3. Ny Tenin'Andriamanitra dia MARANITRA.

Hevitra roa no fonosin'ny hoe "sabatra roa lela"

* Voalohany: Fahefana maha-mpan-

jaka: mandidy, manapaka, tsy misy afaka manohitra, tsy azo ivalozana.

> Tahak'izany ny hery sy fahefana ny Tenin'Andriamanitra, tsy misy mahatohitra, tsy maintsy tanteraka.

• Faharoa: Fahefana maha-mpitsara: mahay manavaka (ny meloka sy ny marina), mahay mamantatra...

> Tahak'izany ny hery sy fahefana ny Tenin'Andriamanitra, mahay mamantatra ny mombamomba antsika rehetra, mbamin'izay mahatsara antsika, mampiharihary sy mampihanjananha antsika eo anatrehan'Andriamanitra. Jesoa Ilay Tenin'Andriamanitra tonga olona, ekeo hanjaka eo amin'ny lafim-pia-nanana rehetra.

Alahady 19 Febroary izay nalaina tao amin'ny Asan'ny Apostoly 19:11-20

Contexte : Asa fitoriana nataon'i Paoly tany Efesoy.

Hafatra 3 no zaraina amintsika amin'izany :

1. Ny hery sy fahefana ny Tenin'Andriamanitra dia ampoban'Andriamanitra ho an'izay mino sy matoky Azy.

Mitondra fahasiranana, manala blocage eo amin'ny fiainana ary manonjy ahy sy anao izany. Noho izany dia ilain'Andriamanitra hafatra Azy sy handini-tena fatratra isika.

2. Ny hery sy fahefana ny Tenin'Andriamanitra dia tsy azo hisandohana ho an'izay tsy nandray Azy.

Tsy izay rehetra manao "tompoko" sy "andriamanitra" no handova ny fanjak'an'Andriamanitra, fa mila fahatsorampy sy fahadiavom-po ny asam-panomo-pa ary manankina tanteraka ny fiai-nana amin'Andriamanitra.

3. Manome anao fahavononana tsara ho amin'ny asa tsara ny Tenin'Andria-

manitra dia mitondra faharesen-dahatra ho an'izay rehetra mahita Azy.

Isika izay nahatsiaro fa nandray ary nigoka ny fitahiana sy ny fahasoavan'Andriamanitra no resy lahatra hampahiratra ny mason'izao tontolo izao mba hahita sy hahalala ary hahafantatra ny Tenin'Andriamanitra.

Tsarovy koa fa n'inoninona tsy fahantanerantsika, dia fadio ny mandsitra an'Andriamanitra, fa rehefa miverina Aminy isika dia tsy tsaroany akory ireny.

Amen

Alahady 12 Febroary izay nalaina tao amin'ny II Timoty 3:14-17

Contexte : Tontolo miharatsy, ton-tolo mihemotra.

Misy herin'ny maizina manozongo-zona ny fiainantsika.

Ny vaovao mahafaly ho antsika anefa dia ilay hery sy fahefana ny Tenin'Andriamanitra izay ahatsapantsika fa "spécial" isika.

1. Ny Tenin'Andriamanitra dia mampahendry antsika.

Mampianatra antsika hino sy hanaiky hahalala an'i Jesoa Kristy ny Tenin'ka hahaintsika manavaka ny tsara sy ny ratsy.

2. Mahaso antsika ny Tenin'Andriamanitra :

- Faharesen-dahatra: Mamelona ny fi-noana ao anatintsika.

- Manitsy: Mamerina antsika amin'ny lalana voasorati' Jehovah dia ny lan'ny Famonjena izany.

- Fahamarinana: Ao amin'i Jehovah ihany no ahitana ny fahamarinana.

3. Manome anao fahavononana tsara ho amin'ny asa tsara ny Tenin'Andria-

manitra.

Rehefa mifikitra amin'ny Tenin'Andriamanitra isika, dia manana fijery vao-vao amin'ny asam-panomo-pa ary mandrisika antsika hanao asa tsara amin'ny zavatra rehetra izany.

Fikiro, hazony, haino ny Tenin'Andriamanitra fa ataon'Andriamanitra "spécial" isika. Amen

Alahady 05 Febroary izay nalaina tao am Zakaria 1:1-6

Contexte: Ny fahatezeran'Andriamanitra mirehitra noho ny amin'ny vahoakany nihodina taminy.

Inona no andrasan'Andriamanitra amintsika raha te hamitonny izany fahatezeran'Andriamanitra izany isika? Hafatra telo no omeny antsika:

1. Miverina Amiko.

Isika mitodi-doha any Aminy sy vonona hiala amin'ny ratsy fanao no andrasan'Andriamanitra amintsika.

2. Miverina amiko Izy.

Miverina amintsika ny famindrampon'Andriamanitra rehetra vonona hi-fampiresaka sy handray Azy isika.

3. Izay ataontsika ihany no mivaly eo amin'ny fiainantsika.

Tsy afaka miala amin'izay vokatry ny nataony ny olona tsirairay.

I Jesoa anefa neken'Andriamanitra ho faty mba hisolo heloka antsika. Izany dia manambara amintsika fa tia antisika Andriamanitra, ao anatin'ny Fony tokoa isika ary tena "spécial" Aminy.

Noho izany, andao hanova ny fiainantsika ka hiala amin'ny ratsy fanao, fa mijery antsika amin'ny famindrampon'hatrany Andriamanitra.

Amen

Ny nitondra ny hafatra dia Pasteur RAVALOSON FJKM Ankadifotsy



TENY FIAINANA

"Fa hevero ny fiantsoana anareo, ry rahalahy, fa tsy firy no olon-kendry araka ny nofo, tsy firy no olona mahery, tsy firy no avo razana ; fa ny adala amin'izao tontolo izao no nafidin'Andriamanitra hampahamenatra ny hendry..."
I Korintiana 2: 26-27

> VOLINTSAINA

Ny fahamasinana

Raha miresaka amin'ny olona ianao ankehitriny ny amin'ny fahamasinana-toetra, fahamasinam-pitondran-tena... dia toy ny maivan-danja izany, toy ny efa niaozan'ny toetra ndro, toy ny fiheverana azy. Laso fanesoana aza matetika ny hoe: "nareo koa miseso ho masinabe", «toy ny tamin'ny andron-dr' Mosesy izany fa tsy miady amin'ny fiainana amin'izao intsony».

Mahasarotiny an'Andriamanitra anefy, na tantsiatsana na tsia, ny fahamasinana, miverina in-1000 eo ho eo ny teny: "masina" ao amin'ny Baiboly ary anisan'ny fitsipi-piaianana nomenyn hoe: "Mitenena amin'ny fiagonana, dia ny Zanak'Israely rehetra, hoe: Aoka ho masina ianareo, satria masina Aho, Jehovah Andriamanitra reeo Lev. 19: 2". Ho an'ny zanak'Andriamanitra izany dia toetra nolovainy avy tamin'ny Ray izany fahamasinana izany. Mitomboa amin'ny fahamasinana!!! fifiav

> PERIKOPA MARTSA

05 Martsa - Karem II
Isa 1.21-26 / Mat 5.43-48 / Rom 6.15-19

12 Martsa - Karem III
Hosea 2.10-22 / Lio 10.25-37 / Rom 5.15-21

19 Martsa - Karem IV
Jer 33.1-9 / Mat 9.9-13 / Efes 4.17-24

26 Martsa - Karem V
Zefania 2.1-3 / Jao 7.14-24 / 1 Timoty 2.1-7

FAFANA

Mischo isam-bolana
Talen'ny gazety
Ravaloson Mpifandrina

Mpandrindra : ANDRIANARISON Veronica
RAHAINGOMALALA Sidonie

Komity fanoratana :

RAZAFINDRANGALY Ninie

RAKOTOARIVELO Tojo hery

RAZAKA Ianjainaina

RAMARO Rojo

Fanompoana an-tsary



Ny Raiamandreny Mpitandrina Ravaloson mivady, ny Mpitandrina Ranjakavola mivady ary ny birao-mpiagonana nanapaka ny mofomamy teny amin'ny CCI Ivato



Fiaraha-nisakafon 'ny Mpihevi-draharaoha teto am-piangonana



Niavaka ny haingo-tsehatra ny 14 Febrero nataon'ny Saha Edena tao anatin'ny Herinandron'ny fianakaviana.



Fitrotraona am-bavaka an'ireo biraom-piangonana ny alahady 12 Febrero 2023

MTA Fanokafana ny fankalazana an'Andriamanitra noho ny faha-35 taona

Eno 35 taona amin'ity taona 2023 ny fikambanana Mpamakiteny Ankadifotsy. Ny alahady 19 Martsa 2023 no andro nato-kana ho fanokafana ny taompankalazana ho fiderana an'Andriamanitra eto amin'ny FJKM Ankadifotsy amin'ny 10 ora maraina. Ny teny faneva : "Raiso ny tenin'Andriamanitra ho sabatry ny Fanahy". (Efesiana 6:17). Hisy ny fiarahana misakafo amin'io fotoana io ho fiombonana amin'ireo mpikambana rehetra nandaloo tao amin'ny fikambanana, ary ireo fitandremana nahavitana ny fampiofanana. Ny Groupe ACACIA no hanafana ny fotoana izay tarihin'ny prezida synodaly Iarivo Avaradrano. Ny fiarahana mamaky Salamo isan'andro no tsangambatom-pinoana ary ny fampiofanana ivelany ho an'ireo synodamparitany. Hisy ny trano heva amin'io fotoana



Mpamakiteny FJKM Ankadifotsy

io ahitana ireo entana misy ny sary famantaranana ny 35 taona toy ny : penina, porte clé, T-Shirt, Baiboly misy anarana, boky kely fandraisana naoty (toriteny). Ny tsangam-bato dia ny ahazoana ny "Studio de production", ahahafana mamoto irao fandaharana vokarin'ny Mta toy ny Hazoto Hamaky Baiboly izay alefa ao

amin'ny Radio Fahazavana ary ny Perikopa hampianina ho an'ireo fitandremana ham-piofanina. Maro ireo fitandremana hisitraka ny fampiofanana amin'ity enim-bolana voalohany ity toy ny FJKM Anosipatrana, Anosizato Hebrona, Ankadikely, Manjaka Avaradrano, Antsahavola Fitiavana.

Fambolen-kazo sy Fifampiarahabana taom-baovao no natao teny amin'ny SAF FJKM Isoavina Ambanitsena.

Zana-kazo "Freine" 185 no voavolin'ny Mpamakiteny Ankadifotsy ny Sabotsy 11 febrero 2023 tao amin'ny Saf Fjkm Isoavina Ambanitsena. Izany dia fanatanterahana ny hazakazaka masina ny Fjkm "tontolo Maitso". Tamin'io fo-toana io ihany koa no andro nato-kana ny fikambanana ho Fifampiarahabana nahatratra ny taona vaovao 2023. Nisy ny fanolorana fanomezana ho an'i Filoha sy ny fahatsiarovana ho an'ny mpikambana. Nofaranana tamin'ny fizarana mofomamy ny fotoana. Ny 1 novambra 2023 indray ny fivoriamben'ny Mpamakiteny aha-fahana mandinika sy manapaka ireo fitsipika anatin'ny fikambanana.

Rojo RAMARO

AFIFAB Anjarantsika eto Ankadifotsy no mandray ny fifampizarana traikera

Ny sabotsy 25 Martsa 2023 amin'ny 2ora sasany no handraisantsika eto amin'ny FJKM Ankadifotsy ny "Arikasa" fifampizarana traikera hiarahana amin'ireo fitandremana eto an-drenivohitra manana rafitra Asa Fifandraisana sy Fampahalam-baovao (AFIFAB) sy gazetim-piangonana.

Efa fanao ny fihaonana tahaka izao fa izao isika eto Ankadifotsy vao handray izany

Ny AFIFAB foibe no tompon'andraikitra voalohany amin'ity hetsika ity. Ny tanjona dia ny fifampizarana traikera eo amin'ny lafiny fifandraisana sy fampahalam-baovao indrindra ao anatin'izao fihazakazaky ny teknolojia izao. Tanjona ihany koa ny hanatsarana ny fandraisan'ny vahoakan-

Andriamanitra ny fitoriana ny Filazantsara.

"Ny gazetim-piangonana, ny haino vaky jery manoloana ny fiangonana 2.0" ny lohahevitra hodinihana amin'io fotoana io.

Ny alahady 26 Martsa 2023 kosa dia Alahadin'ny AFIFAB Foibe FJKM, Fanateram-bokatra kosa ho an'ny Afifab Ankadifotsy.

Hanasana ny mpianakavin'ny finoana izany fotoana fifampizarana izany. Ny Alahady 26 martsa 2023 dia Alahadin'ny AFIFAB Foibe FJKM, Fanaterambokatra sy ho fitrotraona amim-bavaka kosa hoan'ny Afifab Ankadifotsy dia ny siteweb, ny VTM ary ny Gazety Fafana miaraka izany.

Komity Gazety Fafana sy AFIFAB Ankadifotsy



Antsam-piderana niarohana tamin'ny Safif ny alahady 26 Febrero lasa teo.



Fambolen-kazo sy fifampiarahabana noho ny taom-baovao no nataon'ny MTA teny amin'ny SAF FJKM Isoavina Ambanitsena

Fikarakarana voninkazo "Saha Edena"

Ireo tompon'andraikitra mikarakara ny voninkazo amin'ity volana Martsa 2023

- 4 mars : groupe 6
- 11 mars : groupe 7
- 18 mars : groupe 8
- 25 mars : groupe 9

Nanangona Malala Soa

MBA SAINO

Azy Irery

Fa an'iza ny Fahefana sy ny Hery!
An'Andriamanitra Irery
Ilay mampisy ny tsy misy
Sy manaoana ny misy
Ka sao dia diso hevitra
Sy mitompo teny fantatra
Amin'izay mety ho trangan-javatra
Fa minoa ilay Lehibe sy Mahery
Minoa ilay Teny fampanantenana
Dia ho hitanao ny Fandresena

RTH (Rakotoarivelto Tojo-Hery, 23/02/23,
Ivandry, 2ora sy 20mn)